

Tuesday, September 16, 2025

Time - 2:30 pm

RS MP

Rajya Sabha MP Pu K. Vanlalvena chuan vawiin khan Sairang Rel Station tlawhin Rel Service chu changtlung zawka kalpui tur leh mipuiin an chhawr tangkai theihna tura theihtawp chhuah turin thawktute a ngen.

Pu K. Vanlalvena hian tuna Rel Service mek Sairanga atanga Guwahati kal leh Sairang atanga Kolkata kal leh Sairang atanga Delhi chu awm mahse hei aia tam awm belh se an duh thu station thuneitute a sawipui a, mipui mamawh phuhruk nan Sairang atanga Silchar kal chu nitin lehlung awm thin se a duh thu sawiin Railway thuneitute pawhin awm an tih thu an lo sawi a, Guwahati-a North East Frontier Railways General Manager sawipui tura an lo ngenna chu Pu Vena chuan lo bawhzuipui a tum thu a hrih nghal bawk.

Rajya Sabha MP hian Sairanga Rel service hi Diesel Train ala ni rih chu electric train a nih vat theih nana chak taka hma la tura hrihlin thla 6 chhunga peih hman an tum thu an sawi bawk.

Prime Minister Narendra Modi an September ni 13-a a hawn tak Mizoram atanga Rel Service hi tun dinhmunah 3 a awm mek a, Union Railway Minister Ashwini Vaishnaw sawi danin bungraw phur rel a awm nghal dawn bakah hetah hian Rfrigerated coach pawh a awm dawn a ni.



CSS PROTEST

CSS hnuaia thawk intelkhawm All Mizoram CSS Employees Coordination Committee AMCECC chuan vawiin khan Mizoram hmun hrang hrangah sorkar laka lungawi lohna an lantir.

Aizawl District Magistrate-in thla 2 chhung Sawrkar Office awmna hmun hrang hrangah mi 5 aia tam punkhawm khapna tichhuak mahse Aizawl district-a CSS hnuaa thawkte chu vawiin khan Joint YMA Field, Aizawlah pungkawmin lungawi lohna an lantir a. He hunah hian AMCECC General Secretary Pu Vanlalpeka chuan thusawiin, kumin April ni 15 atanga ni 17 chhungin pen down strike an lo nei tawh a, DP&AR Minister in theihtawp chhuaha bawhzui a tiam avangin April ni 19 ah sorkar nen inremna an siam a, May ni 19-a representation an thehluh chu August thla tawp lama an ngaihvenin, an lehkha thehluh a bo thu an dawng a, an chhui zelnaah file engmah a kal lo tih an hmuchhuak a ti a, inremna an siam hnuah sorkarin a ngaihtuah ve mai dawn emaw an tih laia a ngaithah chu hreawm an tih thu sawiin, September ni 3-a general body thukhawm chuan nawrh huaihawt hi an rel ta tih a sawi a ni.

Vawiina AMCECC lungawi lohna lantirna hi Mamit, West Phaileng, Marpara, Kolasib, Pukpui, Vairengte, Kawmpui, Champhai, Farkawn, Darlawn, Sialsuk, Lawngtlai, Chawngte, Bualpui, Sangau, Lungpher, Lunglei, Zobawk, Tlabung, Siaha, Tipa, Saitual, leh Phuaibuang ah te pawh neih a ni.

AMCECC hian Mizoram sorkar laka an thil phut hrang hrang chungchangah thu lawmawm hriat tur a awm loh avangin lungawi lohna lantir nan tun thla September ni 9 atanga ni 11 thleng khan Mass Casual Leave an lo la tawh a ni.



SEVA PAKHWADA

BJP Thalai(Yuva Morcha) chuan Prime Minister Pu Narendra Modi-a piancham lawm nan Aizawl ah Marathon Race buatsaih a ni dawn a ti.

Vawiina Aizawl Press Club-ah thuthar thehdarhtute an kawmnaah, BJP Mizoram State Yuva Morcha President Pu Robinson Malsawmtluanga Hmar chuan kum danga an lo tih tawh thin angin, Prime Minister Pu Narendra Modi-a piancham (September ni 17) leh India hnampa Mahatma Gandhi-a piancham (October ni 2) inkarah midang tana luanchhuahna hun "Seva Pakhwada" an buatsaih leh dawn tih sawiin, ram pumah September ni 21-ah marathon race buatsaih a ni dawn a, hetihlai hian 'Chawlhni' a nih avangin Mizoram ah chuan September ni 20 (Inrinni) ah Aizawl Bawngkawn atangin Ramhlun veng lam kawngah tanin Lammual thleng buatsaih a ni

dawn a, Mizo thalai a tam thei ang ber tel ve turin a sawm a, he hunah hian a tlan zawng zawngte chu certificate leh T-shirt hlan an ni vek dawn a. Pakhatna chuan cheng sing 1 bakah Medal leh certificate, pahnihna in cheng 7000 bakah Medal leh certificate, pathumna in cheng 5000 bakah Medal leh certificate te an dawng dawn a, top 10-a lang pha te chuan 'Consolation Prize' an dawng vek dawn bawk a ni.

Pu Robinson Malsawmtluanga Hmar Chuan BJP chuan ram intodelh leh ram changkang an nih theih na tura thalaite’n hriselna an ngaih pawimawh a tulzia inzirtir nan leh mi harsa zawk tanpuina kawngah pawh a kawhhuhtu an nih theih nan he marathon race hi an buatsaih tih a sawi bawk a ni.



DAMPA BYE ELECTION CAMPAIGN

Dampa bial by-election neih hun tur puan la nilo mahse party hrang hrangin candidate tura an chhawp chhuah ten ngawrh takin campaign an chhunzawm zel.

Puan tawh angin Dampa bial ah hian ZPM atangin Pu Vanlalsailova ding tura ruat niin MNF atangin Dr R. Lalthangliana ruat a ni a, Congress atangin John Rotluangliana ruat niin BJP lamin candidate an la puanglo a ni.

ZPM Dampa bial by-election campaign committee huaihawtin bial chhunga unit tlawh chhuah program hman mek a ni a, inthlan puan hma in Block Conference neih tum niin Chief Minister leh ZPM Leader Pu Lalduhoma hova hman tur a ni a, Candidate bakah party mi te ngawrh takin an campaign mek a ni.

MNF Party candidate Dr R Lalthangliana chuan Dampa bial an fan an chhunzawm zel a. ram mipui rawngbawltu an nih avangin an hun chhûngin sùlhnu tha leh sawizui tlak rotling bial chhûng tan hnutchhiah tum a pawimawh ber fo tih sawiin a sawiah nilovin a thil tih tawhah thlir fo turin a chah a ni.

Hetihlai hian Congress Candidate Pu John Rotluangliana pawh vawiin atangin a campaign tan a, Dampa biala khaw hrang hrang a tlawh a ni.



SEVA PARV

Mipui rawngbawl leh sorkar inrelbawna tha tih thupui a hmangin Prime Minister Narendra Modi sorkarna hnuaiah kum kalta chhung khan hmasawwna kawng hrang hrangin kalpui a ni.

Tun tum Seva Parv hunah chuan khawvel boruak chhe zel tur venna kawnga India hmasawwna han tarlang ila.. Kum 11 kal ta chhung khan ramngaw humhalh mai bakah boruak tih thianghlim nan kawng hrang hrangin sorkar laipui chuan hma a la a.

France ram khawpui Paris-a COP21 neih ah India chuan kum 2030 ah clean energy capicity zaa 40 neih alo tiam tawha, mahse hmalakna chak tak hnuaiah he intiamna hi a hun bituk a thlen hma ai a kum kua a hma kum 2021 khan tih hlawhtlin a ni.

